


范文忠公文集

一



范文忠公文集

(一)

范文景著

本傳

范景文，字夢章，吳橋人。父永年，南寧知府。景文幼負器識，登萬歷四十一年進士，授東昌推官，以名節自勵。苞苴無敢及其門。歲大饑，盡心振救，闔郡賴之。用治行高等，擢吏部稽勳主事。歷文選員外郎，署選事。泰昌時，羣賢登進，景文力爲多。尋乞假去。天啓五年二月，起文選郎中。魏忠賢暨魏廣微中外用事，景文同鄉，不一詣其門，亦不附東林。孤立行意而已。嘗言：「天地人才，當爲天地惜之；朝廷名器，當爲朝廷守之。」天下萬世是非公論，當與天下萬世共之。時以爲名言。視事未彌月，謝病去。崇禎初，用薦召爲太常少卿。二年七月，擢右僉都御史，巡撫河南。京師戒嚴，率所部八千人勤王。餉皆自齎，抵涿州。四方援兵多剽掠，獨河南軍無所犯。移駐都門，再移昌平。遠近恃以無恐。明年三月，擢兵部，添注左侍郎，練兵通州。通鎮初設，兵皆召募。景文綜理有法，軍特精。嘗請有司實行一條鞭法，徭役歸之官，民稍助其費，供應平買，不立官價名。帝令永著爲例。居二年，以父喪去官。七年冬，起南京右都御史。未幾，就拜兵部尚書，參贊機務。屢遣兵戍池河、浦口，援廬州，扼滁陽，有警輒發，節制精明。嘗與南京戶部尚書錢春以軍食相訐奏，坐鐫秩視事。已敘援勦功，復故秩。十一年冬，京師戒嚴，遣兵入衛。楊嗣昌奪情輔政，廷臣力爭多被謫。景文倡同列合詞論救，帝不悅。詰首謀，則自引罪。且以衆論僉同爲言。帝益怒，削籍爲民。十五年秋，用薦召拜刑部尚書。未上，改工部入對。帝迎勞曰：「不見卿久，何癯也。」景文謝。十七年二月，命以本官兼東閣大學士入參。

機務未幾。李自成破宣府。烽火徧京師。有請帝南幸者。命集議閣中。景文曰。固結人心。堅守待援而已。此外臣非所知。及都城陷。趨至宮門。宮人曰。駕出矣。復趨朝房。賊已塞道。從者請易服還邸。景文曰。駕出安歸。就道旁廟草遺疏。復大書曰。身爲大臣。不能滅賊雪恥。死有遺恨。遂至演象所拜辭闕墓。赴雙塔寺旁古井死。景文死時。猶謂帝南幸也。贈太傅。諡文貞。

原序

吳橋范文忠公任宰相。未幾捐生殉國。純忠大節。如麗天之日月。光芒激射。亙萬古而常新。而公生平立朝。與夫發於心而宣於言者。世或未盡知也。余忝列禁苑。與修明史。頗悉公生平。今歲校士通州。公之長孫昌平訓導繩祖以所刻公文集十二卷請余序。余先君子嘗及公之門。而余今得挂名公集中。爲幸實大。其何敢辭。當明懷宗時。十七年之間。先後作相者凡五十人。賢不肖雜揉。卒至顛覆不救。比及相公太原已陷。甫逾月。遂更桑海。竟以身殉。公才略過人。曉暢兵法。撫中州時。提一旅衛京師。遂令治軍昌平。護陵寢。其後又令掌南樞。中間以居憂罷官。向使久任公以軍事。或早命公爲相。抱負經濟。坦行而恢展。庶幾可搢大廈之傾乎。用公之才不竟。而公遂以節顯。然天下知其慷慨於禍難之秋。而不知其堅確於平居之日。蓋正色立朝。危言危行。觸迂權勢。百折不回。素所樹立者然也。方公任銓曹。魏璫焰大熾。欲以年例逐黃忠端。李忠毅。周忠毅輩。公挺身與抗。拂衣徑歸。後爲南大司馬。疏持武陵奪情。且力救黃公石齋等。得罪削籍。此二事皆公大節卓然不朽者。夫鉤黨之禍。至熹宗而極。膺滂斃於北寺。洛蜀鑄於端禮。公已作虎鬚之編。而幸爲鴻網之脫。其榮辱生死。一毫髮閒耳。至於身掌戎機。指顧爰立。迺抗時宰方張之氣。干毅主不測之威。挽清議於莫伸。砥橫流於已潰。批鱗激怒。斥逐無悔。其骨鯁何如哉。劉瑾之擅權也。秦人之中。惟一彭澤子然遠之。江陵之固位也。大僚之中。惟一張岳毅然爭之。二人皆聲高當

時名震後世。況公兼而有之。且以純忠大節與日月爭光耶。公始登第。偕定興鹿忠節公。長洲周忠介公。淬礪爲歲寒交。究其末路。大略相等。可謂白首同所歸者矣。詩古文固非公所重。要自簡質古勁。不趨世好。奏疏則公之經濟與氣節存焉。嗚呼。文以人重。人不能以文重也。讀公之文。而想見公生平立朝殉國之本末。忠義激烈之心。其必油然而生也夫。時康熙四十年歲次辛巳重九前三日。提督順天等處學政左春坊左諭德兼翰林院修撰門下晚生武進楊大鶴頓首拜撰。

范文忠公文集目錄

一卷

奏疏

二卷

· 奏疏

三卷

奏疏

四卷

奏疏

五卷

簡牘

六卷

序

七卷

范文忠公文集 目錄

記傳

八卷

碑誌

九卷

行述行狀

十卷

雜著附補遺

范文忠公文集卷一

奏疏

明 吳橋范景文著

起廢緣繇疏以下據銓稿泰昌改元八月

題爲開讀事。文選司案呈到部。伏讀恩詔一款。建言廢棄并礦稅註誤諸臣。已奉遣詔。酌量起用。其有事關國本。抗言得罪。降斥謫戍。永錮殛身者。吏部作速查開職名。分別奏請。召用卹錄。欽此。夫廢籍諸臣。放棄數十年。自分已斷溝中。無復雲霄之望矣。明綸一頒。巖穴生色。亦諸臣殊遭清朝盛事也。臣部仰奉明詔。一朝盡用此百餘人。豈非至願。而敢有後焉。但諸臣窮巖沈晦。姓名常不時聞。黃髮老成。存亡亦難具晰。儻以旣朽之骨。復點啓事。大典爲之不光。或以未當之舉。啓疑宸衷。德意因而中格。則臣之所大懼也。用是再三躊躕。遵明旨。除事關國本。抗言得罪者。查開職名。不論存歿。另本奏聞外。而建言註誤諸臣。灼知最確者。先行起補。其餘次第採訪。不出一兩月。而咨諏當無不真。不出數十疏。而前後亦不相遠。況施爲有序。員缺漸通。銓法自不得不爾也。惟祈聖明。疏上卽下。用如流水。人鮮積薪。則浩蕩之恩。於焉可廣。而師濟之美。於焉立見矣。

考選科道職名疏

題爲開讀事。萬歷四十八年七月二十三日。伏讀大行皇帝遺詔。內開。兩次考選并散館科道。俱令授職。欽此。又查本年二月內本部題。爲目前急務。惟疏通候命諸臣。爲第一義。萬乞卽賜俞允事。奉聖旨。是欽此。本年七月。該本部文選司題。爲從古無八年久候之臣等因。奉聖旨。考選散館各官。已遵遺詔補用。吏部知道。欽此。夫以窮年累月。所仰望而不得者。一朝立爲疏通。以千言萬語所籲請而不得者。一旨最爲明白。諸臣業已連茹而升。臣部無庸補牘以請矣。但周朝瑞等職名履歷。前疏未備。謹載開具上覽。伏祈聖鑒。

卹用建儲被廢諸臣緣繇疏

題爲開讀事。文選司案呈到部。爲照伏讀詔書內一款。建言廢棄并礦稅誣誤諸臣。已奉遺詔酌量起用。其有事關國本。抗言得罪。降黜謫戍。永錮歿身者。吏部作速查開職名。分別奏請召用。卹錄。欽此。夫建言諸臣。而中有事關國本者。或叩清關。或忤時宰。或引義而廷諍。或因人而株連。皆成先帝之令德。厘宗社之遠慮也者。雖宸衷有主。未忍言夾日之功。而犯顏不避。何可沒回天之力。當其慷慨發言。計不反顧時。豈知有今日哉。而一斥長甘。九死不悔。其忠惻良可念也。先帝神明不測。用意淵深。陰採其言。以鞏萬年之慶。陽棄其身。以貽一生之名。今皇上篤念舊人。并其身而顯庸之。卽歿而不忘優恤焉。固已生輝於巖穴。賁彩於泉壤矣。亦諸臣千載一時也。臣部仰遵明詔。除舊輔王家屏之功存密勿。不敢概敘外。其餘疏名上覽。伏祈敕下臣部。再加查訪。存者不次起用。歿者移咨禮部優恤。其有一時開載未備者。再行奏聞。

未敢擅便。謹題請旨。

起原任戶部主事鹿善繼疏

爲計曹念在急公。舉朝望切。宥過。伏祈聖慈免降。以惜人才。以光新政事。文選清吏司案呈。爲照原任戶部河南清吏司主事鹿善繼。公忠不貳。足稱社稷之臣。沈毅有爲。卓爲名教之主。持節可堅百折。籌餉特見一斑。相應請復原職案呈到部。爲照鹿善繼之被謫也。以留藉金花。而其留藉金花也。以需餉急於燃眉。措餉窮於露肘。聊出此不得已之計耳。夫不惜一官。以收潰散之軍心。以存殘破之疆土。以宣上德意。而垂萬世之令名。有臣若此。正宜破格獎拔。用示風勵。而反蒙譴降。人其謂之何。先帝神明天縱。豈見不及此。勿亦以蠲濟之名。不出自上。權宜之法。徑行自下。姑假此以警後來。而重朝廷乎。臣部遵旨擬降。朝廷之權已伸。而今已遵矣。疏上而不報可。益見原無成心。姑留以待後庸。或者別有深意。是未可知也。日見皇上慨發內帑二百萬犒邊。薄海內外。無不仰頌明明。后舉動非常。夫在內者尙可出之。而宏大賚在外者。何不可蠲之以濟亟需。若鹿善繼者。想亦聖明之所欲亟宥也。伏祈敕下。免其降級。照舊復職。邊士聞之。必將曰。國家未嘗忘我。而斷不解體。廷臣見之。必將曰。國家不肯負人。而莫不盡心。非特爲一人之官而已也。

陸原任御史劉光復疏

題爲懇臣效忠可嘉。明主錄用難緩。伏祈起陸。以宏先德事。文選清吏司案呈到部。爲照劉光復既以言

獲罪矣。彼其赤衷欲灑，臣取其心，犯顏不避。臣取其氣，而慈孝之語，奉揚休美，亦舉朝所共欲言者。不聞有大罪也。或但罪其高聲越次耳。然覆盆五載，已寓磨勵之微權，而釋繫一朝，彌見浩蕩之德意。若竟其所爲，必能殫竭忠猷，報答明聖。一以教臣下之忠，一以明聖主之孝，一以廣先帝之仁，一舉而三善備焉。伏祈敕下起陞光祿寺寺丞，在本官感恩而圖報，在諸臣聞風而作忠，亦風勵一大機括也。

鴻臚正卿改用甲科疏

爲臨御方新，朝儀當肅。鴻臚正卿改用甲科，以復祖制事。文選清吏司案呈：照得鴻臚寺正卿，自王用賢察處以後，員缺已四年矣。先後建言諸臣，皆議宜用甲科，此非無據也。查得萬歷元年十一月，鴻臚寺缺正卿，該本部覆准正卿仍用進士，其別途出身者，歷俸年深，但陞服俸官至左少卿而止。此載在職掌。班班可考者，嘗有屠羲英，以嘉靖丙辰進士，繇太僕寺少卿改鴻臚正卿，此卽先帝初年事也。後失其制，概用別途，固以其禮度之素嫻耳。然家起貲郎，以廁九列之班，已自不韻。卽儀習縣臺，以示百僚之瞻，必且不光。雖資格不可局人，而典章自宜還舊。今南鴻臚卿余啓元現用甲科，何獨於北而反不然？合行亟請案呈到部，爲照聖主御極，中外具瞻。漢官之儀，復見於今矣。然肅朝常於九重，宣法儀於百辟，則鴻臚實司其事，而可復以他途混乎？若用甲科，則揚眉於濟蹕之列，而該寺重樹儀於殿陛之間，而朝廷尊所關亦自不細也。旣經該司備呈前來，相應催請，祈敕下臣部，除該寺左右少卿仍用別途，聽其禮熟資深，止加服俸，正卿一缺，務擇中外清望甲科，以充斯任，庶儀觀整肅，典禮昭明，亦維新中一事也。未敢擅便，謹

題請旨

救吏科給事中周朝瑞免降疏

題爲愚忠可鑒。聖度宜宏。祈恩免降。以作敢言之氣事。文選清吏司案呈到部。臣等伏讀聖諭。內閣。朕昨覽文書。見有吏科給事中周朝瑞條議。仰獻愼初三要。內停止金花銀兩。朕卽位之初。言路方開。礦稅已撤。如何擅行瀆擾。此項銀兩。原係舊制進內。以備萬壽聖節等并典禮等項。及各宮賞賜武職軍官俸糧之用。難以停減。周朝瑞這廝要譽妄言。本當拏問。朕哀思皇考皇妣梓宮在殯。姑從輕降一級調外任用。卿可傳示該部。這銀兩還遵照舊規行。特諭卿知。欽此。隨該內閣大學士方揭帖奉聖旨。覽卿所奏。朕已悉知。周朝瑞這廝不諳事體。逞臆妄言。擅行議減內庫金花。阻絕國用。好生可惡。周朝瑞已有旨了。卿不必申救。該部知道。欽此。欽遵。竊念周朝瑞忤觸宸嚴。夫何敢言。臣部仰遵明旨。又何敢言。但周朝瑞職居言路。遭際明時。未忍自負以負主上。慷慨發舒。故不覺慮之過語之戇耳。至所條奏留停金花。以寬民力。而光上德。酌祖制而裕國儲。亦忠於皇上之職分也。乃皇上罪以要譽妄言。夫主聖臣直。名在皇上。下亦何譽之可要。若因此而罪之。則適成其名耳。夫當容言之時。而有拒言之事。恐未免爲聖德累也。日見皇上用人行政。下如流水。舉朝相慶。皆謂衰職不闕。補救無事。臣工此時止宜將順德意。彼目覩大渙王居。不殖貨利。已明知上意所嚮矣。正所謂善將順者。而何深罪乎。雷霆一震。已惕不測之威。露雨旋施。彌彰有容之度。知聖德如天。諒必出此也。伏祈聖慈。免其降謫。照舊供職。使下有犯顏敢諫之士。足見盛世之

有人使上有刻印銷印之舉。愈覘聖心之無我。其所裨益。豈渺小者哉。

總催大僚考選疏以下副銓稿萬歷四十八年

國家正當全盛。朝寧漸見空虛。懇祈聖明。立允會推考選。以備任使。以勤治理事。文選司案呈到部。爲照大僚國之股肱。無股肱何所依毗。言官國之耳目。無耳目何繇聰明。故有馮有翼。有孝有德。盛世所以興隆也。衰世廷無人焉。有人不用。自淪於無耳。今部院見止五六員。科道見止十數員。可謂無人之極矣。啓事頻煩。不蒙報可。豈以臣部補牘。皆爲人求官耶。卽爲人求官。亦以酬庸。而爲官求人。乃以集事。皇上何疑。臣下之深也。積疑成厭。旣有人不用。而積厭成睽。究且欲用無人。是以臣所患者。官無其人耳。人無官則何患焉。獨不見夫避難規便者。以無官爲幸乎。悠悠之口。皆謂皇上吝惜爵祿。然此爵祿。在人主借以神其鼓舞。在臣下借以效其功名。使剋客不予。上失鼓舞之權。下無功名之地。士亦安往不得貧賤者。而人主將與誰共治天下乎。諸疏現在御前。惟皇上留意。立賜俞允。師濟之盛。卽在目前。劄勳之效。可收異日矣。

催大僚疏

爲九列多缺。時事可慮。懇祈聖明。速賜簡用。以保治安事。文選清吏司案呈到部。爲照國家稽古建官。政分六曹。有長以提領挈綱。有貳以分猷佐理。意至深遠也。無事之時。得人以勤邦隆。多艱之時。得人以挽否運。而缺人廢事。從來久矣。皇上試觀近日各部院之官。缺耶。不缺耶。近日各部院之事。廢耶。不廢耶。綜

覈之朝。事聽其廢弛。師濟之世。人任其空虛。所悞者誰之政務。所擢者誰之才賢。則皇上自爲社稷計者。左也。今刑部缺尙書。臣部戶部兵部缺左侍郎。而工部都察院則三堂全缺。南京戶部禮部兵部俱缺。尙書都察院缺左都。會推各官諸疏。現在御前。惟祈聖上立賜俞允施行。

催起廢疏

爲起廢原奉特恩。俞用難容終靳。伏祈渙發。以完盛典。以維泰運。事。文選清吏司案呈到部。爲照起廢一節。臣部言之。非臣部亦言之。章滿公車。無慮數十上矣。而比年以來。未見起用一人。悠悠之口。皆謂皇上有意禁錮諸臣也者。臣伏讀四十一年三月日詔書云云。欽此。欽遵。十行一下。中外動色。使當是時。仰奉成命。漸次敍錄。煥穴巖之光。示綸綍之重。豈不休哉。乃復更端請旨。遂致中格。夫煌煌慈詔。臣民奉之。千萬世垂之。可不是遵是依。而更於何取旨耶。德意原自浩蕩。臣部自失奉行。罪復何言。今日者。明布臣部之失於天下。亦惟成恩詔之信耳。然臣又反覆思之。開讀方新。原不必於覆請。時日既久。勢又難於徑行。浩蕩德意。亦求皇上自始終之而已。蓋諸臣之被放也。明主豈真有畢世之怒。勿亦惡其自爲名。而以老其才。沈其氣乎。而困衡磨礪。遠者二三十年。近者亦十餘年。其才已老。氣已沈矣。使其竭忠盡節。必能爲國家擔大事。定大難。而不撼始也。惟皇上成之。終也。惟皇上用之。旣已用之矣。名於何有。惟不用。乃有其名耳。何也。諸臣或慮國本。或抗稅監。大率事而獲罪者十一。言而獲罪者十九。吐耿懷亮言而有效。適昭主德之嫩。憂盛危明。幸而不驗。彌見宗社之福。一旦賜環。聯翩以起。在諸臣止見不測之恩。在舉朝止見

有容之度。有如其言。收其效矣。猶令遺逸。抑厄不展。使追論者舉其遺事曰。某某爲建儲。某某爲罷稅。某某爲一事。詿誤而不蒙解網。日在人口實間。毋乃爲聖德累乎。聖孝五十而慕。千古爲昭。明詔所及。薄海無不傳誦。而獨遺於林莽之英。彼不知者。謂聖明真有成心。渙綸亦可反汗。臣深爲皇上惜此名也。爲此不避忌諱。容臣遵前恩詔。陸續列銜題補。如是則皇上錫類之孝。彌宏而微臣以人事君之責。少塞矣。

總催考選疏

爲考選原係典章。空虛大失政體。懇祈聖明。總俞兩咨考選。以復祖制。以慰人心事。文選清吏司案呈。爲照官以言名。原以用其言。非徒用其人也。今考選不下而題差。差又不下而九年久候。三咨并壅。若有意於厭絕言官也者。從來大奸惡大刑獄。孰不賴其廓清。而奸人猶有所畏而不敢逞。言亦何負於國。而必欲厭絕之也。況欲禁其言。先錮其人。皇上以爲言可禁乎哉。防川而潰。日後之決裂必多。欲挫其人。先恠其官。以爲人可挫乎哉。守株而待。正氣之屈抑必甚。皇上卽欲厭絕之不能矣。徒彰此名於天下耳。城門開。言路閉。宋人舉以爲諺。而今當城門將閉之日。言路猶復不開。則有心者之所深恐也。用敢不避煩瑣。補牘上請。伏祈聖明省覽。速將癸丑丙辰兩咨考選周朝瑞等。立賜允用。不特暢七八年久鬱之人情。亦所以存三百餘年相傳之典制矣。

催丙辰一咨考選疏

爲題差原非初制。考選早宜允行。伏祈聖明。速俞丙辰一咨。以復舊章事。文選清吏司案呈到部。爲照考

選之法。先年每歲一取。不間歲一取。無有數歲不選。踰時不下者。自行取變爲留部。已失初意矣。考選變爲題差。而考選之意失。題差有下有不下。而題差之意亦失。失非聖世之所宜有。而想亦非明主之所樂居也。皇上念法祖制。事事循舊章。豈獨於考選一事而疑之。今丙辰一咨。現在待命。若一時盡下。連茹同升。在諸臣免於守候。壯敢言之氣。鼓任事之心。一便也。在皇上免於批答。明宸衷之斷。昭主權之尊。一便也。而在臣部。亦止有將順。有奉行。而免於催請。其便不亦大哉。惟聖明其利圖之。

催癸丑一咨考選疏

爲敬循職掌。懇祈聖明。速俞癸丑一咨。考選諸臣。以濟缺乏。以光聖治事。文選清吏司案呈。爲照臣以職在用人。而用人之大者。無過考選。今癸丑一咨。候命已八年矣。其時不爲不久。差用已二十餘人矣。其局不可不完。先後催請。幾於舌敝。穎禿。而天聽彌高。不見省悟。夫以臣部考選。而使諸臣交章共催之。猶然不盡下。亦臣之罪也。皇上豈真欲奪臣部之職掌耶。今見在候命者。科止十二員。道止四十三員。聖明舉動。往往初時持之甚堅。臨時應之當可。將勿欲留此盡下於臣部。以存一織之職掌。未可知也。伏祈皇上將癸丑一咨。即時盡賜俞允。臣部有詞於人。皇上有詞於臣部。豈止濟萬分之缺乏而已哉。

催補京堂疏

爲京堂懸缺甚多。積滯難疏。懇祈聖明。亟賜點用。以襄化理事。文選司案呈到部。爲照國家之用人也。雖以採望。亦以循資。而所推擇爲京堂者。非望之隆而資之深者不與焉。故彬彬有人。可以爲卿貳。可以爲